

## Waar of niet waar?

Dick van Bloemendaal

*Hele kleine verhaaltsjes die soms warkeluk gebeurd bin en verhaaltsjes die ik uut m'n duum 'ezeugen het. Veur julie een vraag, mar veur mien een weet, welke wel of niet waar bin.*

### Kiespien

De boeren op Norden wisten al vrog dat samenwarken grote veurdelen had. Je han dan gauw un koppel volk bie mekaar um ut wark te doen en de hooischudder en de meibalk brochten vlugger dur geld op. Ok de vrouluu warkten vaak mee as de rog dur of mos en mit ut hooien. Zo han ze disse keer of 'espreuken dat ze um half twee zouwen beginnen um de rog dur of te haolen en stipt op tied zatten ze op de scheivoor bie mekaar te wachten tot ze dur allemaol waren, mar Jan was dur nog niet. Ze snapten dur niks van waar of hie bleef want aarst was hie altied keurig op tied.



Effe laoter kwan Jan dur an en hie keek bar zuunig van um of. Toen ze vreugen waarom hie zo laot was vertelde hie dat hie zo'n machtige kiespien had en dat hie tuus 'probeerd had um de zere kies te trekken mar dat ut mislukt was. Hie had een touwtje um een dennesliet van de hilt 'ebunnen en ut are

end an zun zere kies en toen was hie van de hilt 'esprungen , mar hie had pech want ut touwtje was iets te lang, mar ok te kort um mit zun voeten goed op de vloer te kunnen staon.

Van arremeu begon hie te schrauwen dat ut un lieve lust was en dat heurde Hentje en die kwam geliek de deel op runnen. Ze overzag de situatie, nam ut broodmes en snee ut touwtje deur zodat Jan weer op zun beide benen kos staon.

Hie is toen vlug naor ut land 'egaon um te helpen, mar nog steeds verrekte hie van de kiespien. "Keel", zeit Bessel tegen um "zeeg dat dan meteen, k'het de combinatietang bie me, doe je gapert mar us los" en mit un beste ruk truk hie Jan zun zere kies dur uut. Jan tufte un paor keer un kwalster bloed van um of en nam dur een varse pruum tabak achteran um de boel te ontsmetten. Daornao bin ze as te mieter an ut wark 'egaon um de verleuren tied weer in te haolen.

*Dit verhaoltsje is me verteld deur Gerard Schut, oudste jong van Dirk (Theodorus) Schut van de Beukenlaon en kleinzoon van Pa (Graddus) Schut van café De Halve Maon van de Harderwiekerstraot. Hie het dur ok un mooie tekening van 'emaakt.*

+++